

दिनांक 02.05.2025

समय: 18.45 बजे

- मुम्बई मांय चाल रह्या मीडिया अर मनोरंजन शिखर सम्मेलन मांय सदस्य देश वेक्स घोषणा अपनायी-रीतियां अर संस्कृति ने आगे बधावण मांय मदद माथे एक राय बणीं
- मुख्यमंत्री भजनलाल शर्मा री सदरत मांय जयपुर मांय स्वास्थ्य विभाग री समीक्षा बैठकं
- प्रदेश रो खान महकमो सालाना 12 हजार करोड़ रुपया ऊं बत्ती आमदनी हासिल करणो तैय कीनों
- राज्यपाल हरिभाऊ बागडे बांसवाड़ा मांय नुवी शिक्षा नीति ऊं जुड़ी राष्ट्रीय कार्यशाला रो उद्घाटन कीनों

000

मुम्बई मांय चाल रह्या वैश्विक सम्मेलन – वेक्स रे दौरान आज व्ही वैश्विक मीडिया वार्ता मांय वेक्स घोषणा ने अपनायी ज्यीं इण मांय सदस्य देश रीति-रिवाज अर विरासत ने आगे बधावण रा काम मांय मदद करण बाबत् एक राय जतायीं वेक्स शिखर सम्मेलन रा तैत राख्यी ज्यी मीडिया वार्ता मांय 77 देशां रा नुमाइन्दा सिरकत कीनीं विदेश मंत्री सुब्रह्मण्यम जयशंकर अर सूचना अर प्रसारण मंत्री अश्विनी वैष्णव री सदरत मांय राख्यी ज्यी मीडिया वार्ता मांय सगळा देश गलत अर भरमावण वाळी जाणकारियां ने जनता बीचे पूगावण ऊं रोकण अर मीडिया री अखंडता, तथ्य-आधारित पत्रकारिता अर जिम्मेदार विज्ञापन ने बधावो देवण माथे ई सहमति जतायी ज्यीं मीडिया अर मनोरंजन रा हलका मांय दुनिया मांय भारत री पिछाण बणावण रा मकसद ऊं चाल रह्या वेक्स सम्मेलन मांय आज केई सत्र राख्यी ज्यां विदेश मंत्री एस जयशंकर वैश्विक मीडिया संवाद रो उद्घाटन कीनों ई मौके वे कह्यो के प्रौद्योगिकी अर परम्परा ने सागे मिल र चालणो चाहिजें वे कह्यो के प्रौद्योगिकी देश री अनमोल विरासत ने बुलंदियां ताई पूगावण अर जाग जगावण री कुंजी हैं ई मौके सूचना अर प्रसारण मंत्री अश्विनी वैष्णव कह्यो के मीडिया अर मनोरंजन जगत रो बाजार तीस खरब अमेरिकी डॉलर रो हैं वे कह्यो के रचनात्मकता सरहदां रे पार ई लोगां ने जोड़े हैं सम्मेलन मांय काल मीडिया अर मनोरंजन रा हलका रा साल 2024-25 रा आंकड़ां रा बारा मांय हैंडबुक जारी करी जावेलां

000

केंद्रीय संस्कृति अर पर्यटन मंत्री गजेंद्र सिंह शेखावत आज नई दिल्ली मांय अभूतपूर्व अवसरों की धरा-भारत मुद्दा माथे राख्यी ज्यी खुली सेमीनार रो उद्घाटन कीनों ई मौके श्री शेखावत कह्यो के लारला दस साल मांय देश मांय सगळा हलका मांय मोकळो विकास महसूस करी ज्यों वे कह्यो के भारत कने सही बूतो, जरूरी बुनियादी ढाँचो अर मजबूत बाजार हैं पर्यटन मंत्री कह्यो के साल 2047 ताई विकसित भारत बणावण रा काम मांय हर हलका अर हितधारक री जिम्मेदारी अर भूमिका हैं

000

वैध वीजा सागे लम्बा बगत ऊं भारत मांय रह रह्या पाकिस्तानियां ने नुवा सिरा ऊं पोर्टल माथे अर्जी देवणी व्हेलां गृह मंत्रालय दीर्घकालिक वीजा नीति रा बारा मांय ओ फैसलो कीनो हैं मंत्रालय रे मुजब ज्यां पाकिस्तानी नागरिकां कने लम्बी मियाद रा वीजा है अर ज्यां ने हाल ताई भारत री नागरिकता नी मिली है, वां ने अब सत्यापित कागजात सागे इलेक्ट्रॉनिक विदेशी क्षेत्रीय पंजीकरण कार्यालय रा पोर्टल माथे ओजू अरजी देवणी व्हेलां पुलिस महानिरीक्षक डॉ विष्णुकांत बताया के गृह

मंत्रालय ई बाबत् हुकम जारी कीना हैं वे बतायो के ई पोर्टल 10 मई ऊं 10 जुलाई ताई अर्जी दी जा सके हैं

000

मुख्यमंत्री भजनलाल शर्मा री सदरत मांय आज जयपुर मांय स्वास्थ्य महकमा रा अहलकारां री मीटिंग राखी ज्यीं मीटिंग मांय श्री शर्मा आयुष्मान भारत अर राष्ट्रीय स्वास्थ्य मिशन समेत न्यारी-न्यारी योजनावां रा काम रो जायजो लीनों मीटिंग मांय लू अर तापघात ऊं बचाव रा बारा मांय ई चर्चा करीजीं मुख्यमंत्री रो संघ लोक सेवा आयोग री ओर ऊं लीरीजी सिविल सेवा परीक्षा मांय चुण्णी ज्या राज्य रा नौजवानां सागे रात रा भोजन रे दौरान मुलाकात रो ई कार्यक्रम हैं

000

पाली जिला मांय सुमेरपुर कने आज तड़के कार अर ट्रक री टक्कर रे कारण व्ह्या हादसा मांय एक ही पिरवार रा चार जणां री मौत व्हे ग्यी अर तीन जणा घणा जखमी व्हे ग्यां सुमेरपुर थाना प्रभारी बतायो के ब्यावर-पिंडवाड़ा हाइवे माथे जाखा नगर बाइपास कने तेज रफतार ऊं जा रही एक कार सड़क री कोर माथे ऊबी ट्रक ऊं टकरा ग्यीं जिला रा रानी हलका मांय कार अर पिकअप री टक्कर रे कारण एक ही पिरवार रा दो जणां री मौत व्हे ग्यी अर 9 जणां जखमी व्हे ग्यां मुख्यमंत्री भजनलाल शर्मा आं हादसां ने दुःखद बताता थकां मरण वाळां रा पिरवार वाळां रा प्रति गहरो शोक जतायो हैं

000

खान महकमा मांय सालाना 12 हजार करोड़ रुपया ऊं बत्ती आमदनी हासिल करणो तैय करी ज्यो हैं खान विभाग रा प्रमुख सचिव टी. रविकान्त बतायो के ई सारू अहलकारां ने हर महीना री कार्य योजना बणावण रा हुकम दिया ज्या हैं वे आज जयपुर मांय अहलकारां सागे राखी ज्यी मीटिंग मांय बोल रह्या हां श्री रविकान्त चालू माली साल मांय मोटी आमदनी हासिल करण सारू समयबद्ध तरीका ऊं काम करण माथे जोर दीनों

000

देवलोक व्ही पैली वाळी केंद्रीय मंत्री अर कांग्रेस री आला नेता डॉ. गिरिजा व्यास रो आज उदयपुर मांय दाग कर दियो ज्यो इण मांय मोटी तादाद मांय जनता अर न्यारा-न्यारा नेता सिरकत कीनीं ई मौके राज्य रा पैली वाळा मुख्यमंत्री अशोक गहलोत अर कांग्रेस रा प्रदेश अध्यक्ष गोविन्द सिंह डोटासरा समेत केई नेता ई मौजूद रह्यां डॉ. व्यास काल गुजरात मांय अहमदाबाद रा एक गैर-सरकारी अस्पताल मांय देवलोक व्हे ग्यी हीं वे केंद्र अर राज्य मांय न्यारा-न्यारा महकमा री मंत्री रहीं ई सागे ई डॉ. व्यास राजस्थान प्रदेश कांग्रेस कमेटी री अध्यक्ष ई रहीं वे राष्ट्रीय महिला आयोग री अध्यक्ष रहता थकां महिलावां रा भला सारू केई काम कीनां

000

राष्ट्रीय लोकतांत्रिक पार्टी रा प्रमुख हनुमान बेनीवाल वां रा हिमायतियां सागे आज जयपुर मांय शहीद स्मारक सामी प्रदर्शन कीनों वे राजस्थान लोकसेवा आयोग रा पुनर्गठन अर सब इंस्पेक्टर भर्ती परीक्षा रद्द करण समेत नौजवानां री न्यारी-न्यारी मांगां कर रह्या हां प्रदर्शन पाछे श्री बेनीवाल हिमायतियां सागे मुख्यमंत्री रा रेहवास ओड़ी जावण लाग्यां ई दौरान वां ने पुलिस कमिश्नरेट सामी रोक लीनां ई रे खिलाफ श्री बेनीवाल वटै ई धरनो देवण लाग्यां ई पाछे पुलिस सांसद बेनीवाल ने वां री हिमायत करण वाळां सागे हिरासत मांय ले लीनां

000

राज्यपाल हरिभाऊ बागडे आज बांसवाड़ा रा गोविन्द गुरु जनजातीय विश्वविद्यालय मांय "राष्ट्रीय शिक्षा नीति क्रियान्वयन में शिक्षक और शैक्षणिक संस्थाओं की भूमिका" मुद्दा माथे राखी ज्यी राष्ट्रीय कार्यशाला रो उद्घाटन कीनों ई मौके श्री बागडे भारत री ज्ञान परम्परा ऊं जुड़ी नुवी शिक्षा नीति रे जरिए विद्यार्थियां मांय रचनात्मक गुण विकसित करण बाबत् कह्यो राज्यपाल कह्यो के नुवी शिक्षा नीति रो भारत ने विकसित देश बणावण मांय खास काम हैं

000

विश्व प्रेस स्वतंत्रता दिवस काल मनायो जावेलां ओ दिन दुनियाभर मांय प्रेस री आजादी अर पत्रकारिता रा मूल्यां री अलख जगावण सारू मणायो जावे हैं राज्यपाल श्री बागड़े मीडिया ऊं जुझ्या लोगां ने प्रेस स्वतंत्रता दिवस री शुभकामनावां दीनी हैं बधाई संदेश मांय राज्यपाल कह्यो के मीडिया जनता ने संवैधानिक अधिकारां रा बारा मांय जागरूक करे हैं वे खबरनवीसां ऊं लोकतंत्र रा जागरूक पहरेदार रा तौर ऊं काम करण बाबत् कह्यो

000

प्रदेश मांय चलाया जा रह्या रास्ता खोलो अभियान ऊं जनता ने घणी साता मिली हैं अभियान रा तैत बरसां ऊं बंद पड्या खेतां अर घरां ताई जावणा वाळा गेला खोलण री पहल करी ज्यी हैं झुंझुनूं मांय काल बारह बंद गेला खुलवायी ज्यां जिला कलेक्टर रामावतार मीणा बतायो के प्रशासन ने मिली शिकायतां रा आधार ऊं समझाइश कर र गेला खुलवायी ज्यां

000

21 जून ने मनाया जावण वाळा अंतर्राष्ट्रीय योग दिवस ऊं जुड़ी तैयारियां सरू व्हे गयी हैं केंद्रीय संचार ब्यूरो रा जोधपुर अर सवाईमाधोपुर दफ्तरां री ओर ऊं काउंटडाउन 50 दिन रे मौके आज जागरूकता कार्यक्रम राख्यी ज्यां ई मौके अहलकार योग दिवस ऊं जुड़ी जाणकारियां देता थकां इण ने रोजमर्रा रो हिस्सो बणावण माथे जोर दीनों ई दौरान नर्सिंग री सिखावण लेवण वाळां अर कर्मचारियां ने योगाभ्यास करायी ज्यों

000

प्रदेश मांय आज ई केई ठोड़ां अंधड़ अर हल्की बारिश व्हेवण रा आसार है, हालांकि जोधपुर, उदयपुर, चूरू अर बाड़मेर समेत केई ठोड़ां लू बाज रही हैं मौसम विभाग ऊं मिली जाणकारी रे मुजब जोधपुर, बीकानेर, अजमेर, जयपुर अर भरतपुर संभाग मांय कटे-कटे बिरखा व्हेवण अर जोरदार बायरो बाजण री संभावना हैं लारला 24 घंटां मांय सब ऊं बत्तो 46 दशमलव 7 डिग्री सैल्सियस तापमान जैसलमेर मांय दर्ज करी ज्यों मौसम केन्द्र जयपुर रा निदेशक राधेश्याम शर्मा बतायो के प्रदेश मांय 7 मई ताई आंधी-बारिश चालता रेहवण री संभावना हैं

.....
000